



44.5357  
3141  
=3



客座贅語卷三目錄

陵祭

山祭

大臣欽遣南京祭告儀



文廟主祭

鄉試考官之始



太學

非三品得謚

南部入內閣

應天主試用編檢

南部三孤

尚書一品三品

他部銜掌南吏部

吏部尚書改南部

生員任宗伯

南部兼北銜

南尚書兼列卿

北銜理南務

大學士理南部

守備二則

1232536

協同守備

參贊機務非南兵衛

大臣高壽

大臣遺腹生子

勛戚久任

二則

蜂螿

化俗未易

新知錄

補諡

鄉賢

梁鍾山定林寺藏經

傅大士

隋棲霞寺請天台智者疏

碧峯和尚

名僧

孝陵碑石

太師臆

龜桃

屏息

介甫絕句

陳智者住金陵勅

徐陵與智者書

毛尚書與智者書

陳後主沈后施物

金甲人

先祖夢中三人

秦檜女墓

猿妖

翟氏

語怪錄

陳公善謔錄

怪石

目靜齒動


評花

客座贅語卷三目錄終

客座贅語

卷三目錄

二



客座贅語卷三

明江甯顧起元輯

同縣傅春官校刊

陵祭

正旦祭孝陵行香果酒清明日祭忌辰

一閏五月初十日無閏用五月

一八月初十日行香中元日祭萬壽聖節日行香十月初一日

行香冬至日祭凡三大祭用祝版已上祭祀俱百官陪

祭遣守備武臣行禮今例遣司香勛臣行禮懿文陵正

旦祭果酒孟春清明孟夏忌辰四月二十五日孟秋中元孟冬

冬至歲暮凡九大祭用祝文已上百官不陪祭惟奉祀

行禮祝文稱皇帝御名謹遣某官致祭於皇伯祖考懿

文太子云懿文陵人稱東陵孝陵大祭一歲止三舉餘

惟行香而東陵大祭者九清卿劉公常言隆殺相懸不知何故或是洪武中舊禮沿而行之耳

### 山祭

牛首山東有觀音山爲貞靜順妃張氏墳妃荆憲王之母也吉山東有南山爲悼熙麗妃李氏墳俱仁宗妃每年遣祭六次順妃墳荆王遣祭如之祝文稱皇帝御名謹遣內官某因里中無知者著之二墳山林皆幽勝而悼熙享堂前有大桂樹翠碧如垂天之雲尤爲怪偉

### 大臣欽遣南京祭告儀

弘治十八年禮部題准今後凡遣大臣於南京祭告天地太廟社稷山川等壇前期致齋三日不用擺列金鼓

隊伍惟用太常寺厨役鋪排扛抬品物或入大內由承天等中門而入或出郊外由正陽中門而出欽遣大臣不可後隨亦不用儀仗祭品止用脯醢酒果百官亦不陪祀並無飲福受胙之儀

### 文廟主祭

上丁祀先師孔子禮部奏准南京國子監祭酒主祭如有事故則南京禮部堂上官主祭昔年祭酒員缺南京禮部侍郎張綸省祭至使署部事郎中主祭輕重失倫誠爲非禮後議祭酒及禮部堂上官或有事故於南京各部大臣內請一員主祭右太常寺志所載近例俱署印官行禮

鄉試考官之始

洪武三年應天鄉試知貢舉官則特進右丞相汪廣洋左丞相胡惟庸也考試官則御史中丞劉基治書侍御史秦裕伯也同考則侍讀學士詹同弘文館學士睢稼起居注樂韶鳳尙寶丞吳潛國史編修宋濂也四年又鄉試主試則兵部尙書吳琳國子監司業宋濂時考試之法猶未定且未專屬翰林官故其制如此

太學

洪武中上以公侯子弟在太學者多驕慢不習訓詔曹國公李文忠提督國子監是以國公而理太學事也二十九年因學正吳啟言上命魏國公徐輝祖率禮部翰

林院官詣監考試諸生等第吏部以次錄用是以國公而試太學士也洪武中起致仕刑部尙書李敬爲國子祭酒致仕試吏部尙書劉崧爲司業是以尙書而起太學官也國初太學之重如此

非三品得謚

國家謚法非三品以上兩京大臣不得與留都大臣之有謚者惟倪文僖謙文毅岳周襄敏金劉清惠麟梁端肅材王襄敏以旂六公皆尙書也張學士益五品而得謚文僖以扈從土木死難之故若大醫院判蔣用文六品官也以技藝小臣侍上起居乃得謚恭靖則尤爲異典矣

南部入內閣

弇州紀南都入內閣者三人一爲新都楊公廷和以戶部尙書一爲梁公儲一爲茶陵張公治皆以吏部尙書當時以爲盛事然梁公楊公先在內閣知誥勅出爲南部尙書此時勅取入閣至京方改兼文淵閣大學士耳又張公已正位尙書未有若萬厯丁未葉公向高以南吏部侍郎徑授禮部尙書東閣大學士者也且公年方四十九又入朝未久卽爲首揆尤爲盛事

應天主試用編檢

主應天試者自正嘉以來必用宮僚及講讀近則講讀亦少惟萬厯壬午副考以修撰沈公懋孝耳考前此永

樂癸未則編修王達戊子則檢討王洪甲午則編修周述正統丁卯則檢討錢溥成化乙酉則編修彭華皆主應天試編檢得主鄉試兩京先朝之制固然爾時若宮坊史官主會試亦恆有之自成化後則制乃大異矣

南部三孤

南京大臣以三孤兼者獨少保參贊機務南京戶部尙書黃福一人而已若太子太保則有四人焉兵部喬宇秦金吏部王用賓戶部周經大都尙書九年考滿則加一品而滿九年者希以故隆萬來南部尤少一品者

尙書一品三品

弇州紀建文中特崇加六部尙書皆正一品於是吏部

尙書張統戶部尙書王鈍禮部尙書陳迪鄭賜兵部尙書齊泰茹瑄鐵鉉刑部尙書侯泰暴昭工部尙書嚴震直皆階特進榮祿大夫然洪武三年始設吏部尙書正三品侍郎正四品屬中書省十三年罷中書省陞尙書正二品侍郎正三品是一尙書也在國朝正二品而或爲正三或爲正一亦已三變矣

他部銜掌南吏部

弇州六卿表紀師公達永樂二十二年以南戶部尙書兼掌吏部宣德二年卒猶止稱戶部考吏部志公以永樂十九年復任南吏部侍郎戶部志公二十二年爲戶書吏部傳言公宣宗卽位晉戶書兼掌吏部與志所紀不同而吏部厯官表洪熙元年許思溫以左侍陞尙書師公兼掌在何時知必有一誤矣

吏部尙書改南部

弇州異典述稱吏部自建文而後益重矣其改南吏部者崔莊敏公恭改南禮部者耿文恪公裕改南兵部者劉公機案崔劉二公皆以丁憂復除止可云起不可云改惟耿公則以北而南且禮部斯可謂之改蓋時有執左道登顯仕者庇其鄉人而耿公居吏部不能遂故出公於南耳未久轉南兵部弘治中召還禮部尋仍爲吏部尙書

生員任宗伯

俞公綱上元人以生員善書由中書舍人天順中官南禮部左侍郎成化三年致政

南部兼北衙

正德初王公軾以南大司徒兼北院副都總師征蜀嘉靖中王公守仁以南大司馬兼北院左都討岑猛張公經以南大司馬兼北院右都平倭至王公用賓以南太宰仍兼翰林院學士蓋優禮儒臣之典也又弇州鄉貳表載隆慶中林公濂以南少宰兼翰林學士

南衙書兼列卿

成化中程襄毅公信爲南京兵部尚書先是以兵書提督軍務平川貴蠻功加兼大理寺卿至是猶兼之

北衙理南務

南翰林掌篆者皆用北衙其它如嘉靖中李默王材瞿景洵陸樹聲俱以太常寺卿掌南京國子監事此以北衙理南務也弇州所述又有屠羲英以常卿掌南監考屠實以南常卿又云萬士和以禮左侍管南禮右侍案萬公自以禮左起南禮右非管事又云翁大立以兵侍管南吏刑二部翁公亦是起官云管亦誤

大學士理南部

宣德四年華蓋殿大學士張瑛以原官掌南京禮部其官稱禮部尚書時北京爲行在故不稱南京也大學士不理閣事而出理部事且又在南京國朝獨瑛一人耳

時蹇夏三楊輩自筦機務瑛本以東宮官僚驟進入閣  
典制詰非上所倚重故理部事如此也

守備

守備永樂二年駙馬都尉沐昕與襄城李隆一同鎮守  
又宣德五年駙馬都尉西甯侯宋琥任守備南京守備  
之久者成國公朱儀天順八年任弘治九年卒在任三  
十三年魏國公徐鵬舉正德十六年任嘉靖十七年復  
任前後共三十二年

協同守備

都督僉事趙倫景泰元年任都督同知馬良成化二年  
任自後皆公侯伯爲之而都督官不得與矣

參贊機務非南京兵部銜

別集言參贊機務非南兵部銜爲戶部尙書黃福張鳳  
吏部尙書崔恭都察院右都御史張純王恕其南兵部  
而非尙書者右侍郎徐琦琦未幾卽陞尙書仍參贊案  
張鳳鹽山人李文達賢爲碑銘言公以景泰癸酉由戶  
書轉兵書參贊又二年召爲戶書天順元年調南戶部  
言鳳以戶部參贊未的也張純史傳純以右副都御史  
奉勅監督南京軍務又一年景泰辛未陞右都御史明  
年奉勅陞兵部尙書參贊守備機務云以右都御史參  
贊亦小不合王公恕以右都參贊亦未久卽遷兵部尙  
書

大臣高壽

南都大臣眉壽者止劉清惠公麟一人年八十有六

大老遺腹生子

童公軒年七十四而卒無子遺腹生一子公預命名曰紫芝見倪文僖公謙墓志銘

勛戚久任

趙輝在永樂十一年癸巳以千戶守金川門成祖奇其貌以長公主配之凡事六朝掌都督府奉孝陵祀至成化十二年丙申卒凡六十四年尙主時年已二十餘計年當九十矣府第在南京宮城後載門北諸公主第皆圯廢獨趙府巋然尙存

徐魏公備謚莊靖自襲爵至卒再提督守備五十四年其孫鵬舉襲公爵至卒三提督守備五十六年

蜂蟻

嘉靖甲寅秋總督糧儲公署中有蜂房懸於檐下不數日大如斗羣蜂聚焉同日中堂忽聚蟻數升有頃四散時衡水楊公宜爲總督甚怪之然竟無恙厥後庚申春總督黃公懋官以軍餉不時軍士嚙呼圍之遲明忿擊督署毀拆一空遂執黃公拉死之懸大中橋坊上自下以箭射之軍四行搶掠當事者曲貸撫之乃定蜂屯蟻聚妖孽先見之萌也然歷七年而始應又不中既於楊公而中於黃公豈人事亦有以致之然歟黃公持法太

苛裁革冗食又吝於出納遂罹斯禍楊太學希澆有文紀其事

化俗未易

湛甘泉先生爲南大司馬令民毋得餐大魚酒肆中沽市無論舉火當鑪致衆叢飲者禁除歲庶民毋得焚楮祀天糜財犯禮姜鳳阿先生爲南大宗伯申明宿娼之禁凡宿娼者夜與銀七分訪拿幫嫖之人責而枷示二公之事皆以立禮之坊制淫之流也然姜之事行僅游治之子以爲不便湛之事行而稱不便者怨聲遂載道未幾法竟不行所以者何都輦之地羣情久甘酣營萬口易至濇羹故當事者往往持治大國若烹小鮮之說

勢固然也故治貴因民

新知錄

廣文劉時卿名仕義官桐城著新知錄二十四卷上下古今捥撫臧否具有依據偶記其二則一日躁心濯舊曰二人同舟有所適一人性急晝夜計程稍阻輒憤懣形爲枯瘁一人性緩任之增食甘寢顏色日澤旣而抵其處二人同時登岸此可以爲躁心者省矣一日察政文子曰察見淵魚不祥班超曰水清無大魚察政不得下和司馬溫公潛虛曰察窺秋毫物駭而逃長民者宜三復焉

補諡

諡以尊名節以一惠古今之大典也故臣不得私其君子不得私其父夫以官秩之顯顯子孫之彊盛遂可以奪天下萬世之公而殺太常博士之議則幾無諡矣吾鄉自玉襄敏後與此典者殆不乏人而竟成闕事余深悵焉因間臆之如陳靜誠遇高不仕之議於攀龍附鳳之時其蹈高且嘉謨入告覺巢由之爲固矣何尙寶遵矢不諱之音於批鱗將鬢之日其義勇至視死如飴覺逢干之爲易矣童尙書軒學攬天人之奧其立身范俗也端而毅顧尙書璘文並徐劉之駕其撫民弼教也惠而明陳中丞鎬督學振鄒魯之遺風而撫綏尤多渥澤殷宗伯邁歷仕挺松筠之素節而恬澹足鎮囂浮此誠

朝亡之珪璋人倫之弁冕亟宜易名以示旌異者也責在後死曷能諉旃

金陵瑣事謂張文僖公與曹文忠公同死土木之難不知何以死同而諡異案曹公初諡曰文襄後乃改今諡頃亦因議諡與當事言文僖諡當改引曹爲例也

鄉賢

鄉賢之舉典重一時祀垂千載必當之者無媿色視之者亡媿辭而後爲之非濫吾鄉此典正嘉以前最爲嚴核後稍寬矣以余所知往詰如姚太守隆之潔慎王給事徽之清直李憲副重之丰稜盧苑馬璧之貞恬沈侍御越之耿介阮憲僉屋之廉靜在當時並許瑒璿在今

客座贊語 卷三  
日尤堪楷式而俎豆尙虛蘋藻未薦豈子孫之無力抑  
採訪之未周聞王公臨歿遺誠厥子太僕曰吾恥入鄉  
賢慎毋溷我噫爾時猶有此言後當何若念之慨然

梁鍾山定林寺藏經

劉勰家貧不娶依沙門居博通經論區別部分而爲之  
敘定林寺藏經其所詮次也所撰文心雕龍中書令沈  
約絕重其文凡都下寺塔名僧碑碣皆出其手

傅大士

大士傅弘東陽郡烏傷人體權應道躡嗣維摩時或分  
身濟度爲任或金色表胸異香流掌或見身長丈餘臂  
過於膝腳長二尺指長六寸兩目重瞳色貌端峙梁武

聞之延於鍾山定林寺天花甘露恒流於地常以經目  
繁多人不能遍閱乃建大層龕一柱八面實以諸經運  
行不碍謂之輪藏

隋棲霞寺請天台智者大師疏

棲霞寺衆保恭等和南竊以瞻慕明德灰琯屢遷展覲  
以來炎涼甫隔伏食至法用稟教門定水澹而無涯詢  
峯高而不極至如止觀方等之義龍樹馬鳴之文莫不  
殫其理窟究其冲妙恭雖不敏少游講席窺翫南北經  
論三十餘年求其奧旨□□不悟觀諸法海寄在餘生  
所冀傾蠡猶欣飽腹然道安之遇澄上人便稱北面惠  
永之逢遠上首卽創東林是知得奉勝人須安勝地者

也恭雖疎薄竊欣往彥所居棲霞寺乃宋代明徵君宅  
僧紹之所建立也鑄山現像疏巖做殿似若飛來無慙  
踊出若其林泉爽麗房宇縈紆桂嶺春芳雲窗晝歇自  
昔高行是用遊寫故寺衆齊誠請延威德惟願俯觀曩  
詰爰降彼居依經受用必垂納處所有園田基業具在  
別條謹共開府士柳願言證成斯誓庶金剛之域與鷲  
嶺而長存法寶斯傳等雞山而不滅謹疏開皇十五年  
八月六日保恭等疏此文麗則高古自非唐以後人手  
筆金陵苾芻中乃有如此人如此文世無傳者特爲載  
之願言官兼秘書監直內史省開府儀同三司嘗奉勅  
撰智者大師碑此文或願言代草未可知也

碧峰和尚

碧峰寶金和尚俗姓石氏乾州永壽縣人也母張氏有  
桑門持鉢乞食以觀音像授之且囑曰汝謹事之當生  
智慧之男未幾果生和尚年六歲依雲寂溫法師爲弟  
子旣薙落髮具戒徧詣講肆窮性相之學已而拊髀歎  
曰三藏之文皆標月之指爾卽更衣入禪林時如海真  
公樹正法幢於西蜀晉雲山中亟往見之公示以道要  
和尚大起疑情三年間寢食爲廢偶攜筐隨公擷蔬忽  
凝坐不動歷三時方寤公曰爾入定耶和尚曰然曰汝  
何所見和尚曰有所寤爾曰汝第言之和尚舉筐示公  
公非之和尙寘筐於地拱手而立公又非之和尙厲聲

一喝公奮前堪其胸使速言和尚築公胸仆之公猶未之許和尚愈精進不懈遂出參諸方憩蛾眉山日採松柏啖之脇不沾席者又三年自是入定或累日不起嘗趺坐大樹下溪水橫逸人意和尚已溺死越七日水退競往視之和和尚燕坐如平時唯衣濕耳一日聽伐木聲通身汗下如雨歎曰妙喜大悟十有八小悟無算豈欺我哉未生前之事今日乃知之急往證於公反覆辨詰甚力至於拽傾禪榻而出公曰是則是矣翌日重勘之至期公於地畫一圓相和尚以袖拂去之公復畫一圓相和尚於中增一畫又拂去之公再畫如前和尚又增一畫成十字又拂去之公視之不語復畫如前和尚於

十字加四隅成卍文又拂去之公乃總畫三十圓相和尚一一具答公曰汝今方知佛法宏勝若此也吾師無用和上有云坐下當出三虎一彪一彪者豈非爾邪先是和尚在定中見一山甚秀麗重樓傑閣金碧絢爛諸佛五十三菩薩行道其中有招禪師謂曰此五臺山秘魔岩也爾前身修道於此靈骨猶在何乃忘之既悟遂游五臺山道逢蓬首女子身披五綵弊衣赤足徐行一黑髮隨其後和尚問曰子何之曰入山中爾曰將何爲曰一切不爲良久乃沒叩之同行者皆弗見或爲文殊化身云和尚乃就山建靈鷲庵四方聞之不遠千里負糧來獻至正戊子冬順帝遣使者召至燕都詔主海印

禪寺力辭之洪武戊申大明皇帝卽位於建業又明年  
庚戌詔和尚至南京夏五月見上於奉天殿遂留居大  
天界寺時召入問佛法及鬼神情狀奏對稱旨後上設  
普濟佛會於鍾山和尚於圓悟關施摩陀伽斛法食竣  
事寵賚優渥夏五月悉粥衣孟之資作佛事七日乃示  
微疾上知之親御翰墨賜詩十二韻至六月四日沐浴  
更衣與四衆言別正襟危坐目將瞑弟子請留一言和  
尚曰三藏法寶尙爲故紙吾言欲何爲夷然而逝後三  
日奉龕茶毗於聚寶山火滅獲五色舍利齒舌數珠皆  
不壞

名僧

余性好山寺每一遊厯意輒欣然尤於荒涼岑寂之區  
倍爲延伫自謂宿世有空門緣所交縉流頗衆若楚黃  
蘖深有之禪邨蜀高原明昱越天臺傳燈之講義越雙  
井惟傳之詩句固錚錚佼佼法中之龍象也吾鄉雪浪  
之洪恩慧解通脫不爲法縛廢跡遺心別有真契洪濟  
之守心精持木义皈依淨土慈悲接物誠感十方余皆  
得參承而接席焉至今思其風義每深歎企嘗謂使余  
結宇中林棲心俗外得如三四公者與偕淨侶晨鐘夕  
梵晏坐經行便可敝屣浮名樂而忘老矣

孝陵碑石

永樂三年秋於陽山采石爲孝陵碑石長十四丈濶三

之二厚一丈二尺黝澤如漆學士胡公廣有游陽山本業寺記而詹事鄒公濟有記乃云二年冬於幕府山陽訪碑石高廣中度尋於龍潭山麓鑿石求趺旣而神龜呈露昂首曳尾介文玄蒼乃於龜下遂得趺材適與碑稱與胡公記異不知前碑材後竟用否石龜今藏孝陵殿中有木平臺上安二御座乃朱紅圈椅前一朱紅案案左一紅匣貯龜於中長可尺餘首昂身形畧似而已右以一空匣配之鄒記言宜藏於太廟今人遂謂太廟中有神龜誤矣

太師窗

秦會之丞相第中窗上下及中一二眼作方眼餘作疏櫺謂之太師窗此卽今之柳葉槁子也俗又名爲不了格

龜桃

今以麪作桃乳形名之曰龜桃俗沿呼不解所謂考太常祭物志有麪龜有麪桃乃知龜自龜桃自桃俗一概呼之失其意矣

屏息

太常供奉祭品如羹醢之類其捧獻人口鼻用物作長袋繫於頸後俗名抵鬚非也志名曰屏息太廟以黃羅它祀以紅紵絹爲之

介甫絕句

王介甫投老金陵依鍾山下居後復捨宅爲寺所題絕  
句關金陵山水者往往多遠情幽景因摘而書之如曰  
南蕩東陂水漸多陌頭車馬斷經過鍾山未放朝雲散  
柰此黃梅細雨何日誰將石黛染春潮復撚黃金作柳  
條西崦東溝從此好筍輿追我莫辭遙日雪乾雲淨見  
遙岑南北芳菲復可尋換得千顰爲一笑春風吹柳萬  
黃金曰南浦東岡二月時物華撩我未參差含風鴨綠  
粼粼碧弄日鶯黃裊裊垂日竹裏編茅倚石根竹莖疎  
處見前村閑眠盡日無人到自有春風爲掃門曰春風  
過柳綠如縑晴日蒸紅出小桃池暖水香魚出處一環  
清浪湧亭臯曰木末北山雲冉冉草根南澗水泠泠縑

成白雪桑重綠割盡黃雲稻正青曰石梁茅屋有彎碕  
流水濺濺度雨陂晴日暖風生麥氣綠陰幽草勝花時  
曰寄公無國寄鍾山垣屋青松掩藹間長以聲音爲佛  
事野風蕭颯水潺湲曰菴雲作頂峭無鄰衣月爲衿靜  
稱身木落岡巒因自獻水歸洲渚得橫陳曰稻畦藏水  
綠秧齊松鬣初乾尙有泥縱蹇尋岡歸獨卧東菴殘夢  
午時雞曰荷葉初開筍漸抽東陂南蕩正堪游無端隴  
上翛翛麥橫起寒風古作秋曰北山輪綠漲橫陂直塹  
回塘澹澹時細數落花因坐久緩尋芳草得歸遲曰與  
客東來欲試茶倦投松石坐欹斜暗香一陣連風起知  
有薔薇澗底花曰野水從橫漱屋除午窗殘夢鳥相呼

春風日日吹香草山北山南路欲無日小雨輕風落棟  
花細紅如雪點平沙權籬竹屋江村路時見宜城賣酒  
家日茆簷長掃靜無苔花木成畦手自栽一水護田將  
綠遶兩山排闥送青來日桑條索莫棟花繁風斂餘香  
暗度垣黃鳥數聲殘午夢尙疑身屬半山園日青青千  
里亂春袍宿雨催紅出小桃迴首北山無限思日酣川  
淨野雲高日午枕花前簟欲流日催紅影上簾鉤窺人  
鳥喚悠颺夢隔水山供宛轉愁日隱隱西南月一鉤春  
風落日澹如秋房巢半掩無人語鼓角聲中始欲愁日  
斜徑偶通南埭路數家遙對北山岑草頭蛺蝶黃花晚  
菱角蜻蜓翠蔓深日江北秋陰一半開晚雲含雨卻低

回青山繚繞疑無路忽見千帆隱映來日定林青木老  
參天橫貫東南一道泉六月杖藜尋石路午陰多處弄  
潺湲日茅屋滄洲一酒旗午烟孤起隔林炊江清日暖  
蘆花轉祇似春風柳絮時日蕭蕭出屋千竿玉靄靄當  
窗一炷雲心力長年人事外種花移石尙殷勤日冥冥  
江雨濕黃昏天入滄洲漫不分北澗欲通南澗水南山  
正遶北山雲日兩山松櫟暗朱藤一水中間勝武陵午  
梵隔雲知有寺夕陽歸去不逢僧

陳智者住金陵勅

天台志有陳宣帝留智者住瓦官勅云京師三藏雖弘  
皆一途偏顯兼之者寡朕聞瓦官濟濟深用慰懷宜停

訓物豈遑獨善一二曹義達口具得朕意也四月一日  
臣景厯少主請於光宅寺講仁王經勅今欲於寺捨身  
僧得大施敬屈講仁王經日自欲聽聞今遣後閣舍人  
李善慶往遲知一二又治光宅寺勅光宅是梁武龍潛  
之地不整處多今勅繕量隨由就功一二羅宣取來意

徐陵與智者書

國清百錄云陳左僕射徐陵與大師書最多門人兢將  
去追尋止得三紙其一曰陵和南昨預沈儀同法席餐  
奉甘露無畏之吼衆咸歸伏然正法炬朗諸未悟自慶  
餘年得逢妙說尋事諮展此不申心謹和南其二曰陵  
和南注仰之心難可敷具拔公至蒙三月二十日旨用

慰積歲傾心麥冷體中何如願一日康勝山中春夏無  
餘惱耳遲復存旨弟子二三年來溘然老至眼耳聾闇  
心氣昏塞故非復在人兼去歲第六兒夭喪痛苦成疾  
由未除愈適今月中又有哀故頻歲如此窮慮轉深自  
念餘生無復能幾無由禮接係仰何言敬重瓌公今還  
白書不次弟子徐陵和南其三曰陵和南放生星聞公  
家極相隨喜事是拔公口具謹不多諮惟遲拔公迂出  
數百里水全其命根如此功德算數無盡隨喜無量此  
不悉諮又其一曰弟子徐陵和南弟子思出樊籠無由  
羽化旣善根微弱願力莊嚴一願臨終正念成就二願  
不更地獄三塗三願卽還人中不高不下處託生四願

客月齋語 卷三  
童真出家如法奉戒五願不墮流俗之僧憑此誓心以策西暮今書丹款仰乞證明陵和南

毛尙書與智者書

其一日累年仰系不易可言承今夏在石像行道欣羨無極又聞欲於天台營道場當在夏竟耳學徒遠近歸依者理應轉多安心林野法喜自娛禪講不輟耳四十二字門令附雖留多時讀竟不解無因諮訪爲恨轉積南岳亦時有信照禪師在岳嶺徒衆不異大師在時善公於山講釋論彼亦邑遲望還綱維大法不者歸鍾嶺攝山亦是棲心之處何必適遠方詣道場希勿忘京師邊地之人豈知迴向傾心無時不積未因接顏色東望

歛滿敬德信人今返書不具弟子毛喜和南弟子諸弟及兒悉蒙平安第三任鄱陽郡第二爲豫章王司馬第四大延卿第五入閣度支郎大兒由在東宮爲中書舍人仰蒙垂顧大善知識大同學輒復遠諮其二日秋色尙熱道體何如禪禮無乃損德弟子老病相仍湯藥無效兼不得自閑轉有困耳仰承移住佛隴永恐不復接顏色悲慨具深仰惟本以曠濟爲業獨守空巖恐違菩薩普被之旨近與徐丹陽諸善知識共訓量等是一山鍾嶺天台亦何分別必希善如三思不滯於彼我京師彌可一二因拔師口具其間願敬道德弟子毛喜和南其三日適奉南嶽信山衆平安弟子有答具述甲乙後

信來當有音外也今奉寄牋香二片熏陸香二觔檳榔  
三百子不能得多示表心弗責也弟子毛喜和南其四  
日今仰餐敷說訓往綽然道俗嗟味般若照明豈是拙  
辭所能稱述弟子毛喜和南按喜榮陽人仕陳官五兵  
尙書爲光祿大夫領軍驍騎將軍瓦官法會獲預聽衆  
懇求禪要躬執弟子禮受六妙門及四十二字法門且  
夜研尋不因事廢徐毛二公皆在金陵與智者往還是  
此中一故事且南朝文筆世如晨星偶搜他志得之鈔  
附於此陵書在沈儀同席聽法沈名君理吳興人尙陳  
武帝女會稽長公主疏請師住瓦官開法華經題宣帝  
勅停朝一日令羣臣往聽陵後身爲法華第六祖嗣章

安之法所願真不虛矣

陳後主沈后施物

瓦官智者禪師在建業靈曜寺後主遣主書羅闌宣口

勅送金像一軀

光跌五寸

釋論一部闕寶樓於案一面山羊

鬚塵尾一柄并匣虎面香鑪一面并匣東田口二又宣

口勅不許讓口且留山中使役勿勞輸送又送扶月供

夏服一通細蕉五端絹布各十疋綿十觔黃屑二斗扶

月米五石錢三千文果菜付隨由扶月送後住光宅寺

沈后致書云妙覺和南今遣內師許大梵往稽首乞傳

香火願賜菩薩名庶藉薰菩提眷屬謹和南送扶月供

薰陸沈檀各十觔黃屑一斗細紙五百張燭十挺赤松

澗米五石錢一千文右件月月供光宅寺大師答啟云  
今名海慧菩薩又後主扶月供薰陸香一合檀香三十  
勛中藤紙一墮乳酥一斗錢二千文右件月月供光宅

寺黃屑開元十道志驩州貢黃屑沈香香之類也

隋煬帝為晉王嚶戒師衣物有聖種納袈裟一緣黃  
紋舍勒一腰綿三十屯鬱泥南布袈裟一緣黃絲布  
襪一具絹四十疋鬱泥南絲布褊袒一領黃紬卧褥  
一領布三十禪鬱泥絲布坐褥一具烏紗蚊幃一張  
紙一百張鬱泥絲布方裙一腰紫縵靴一量錢五十  
貫鬱泥雲龍綾被一緣龍須席一領蠟燭十挺鬱泥  
羅頭帽一領須彌瓊一領銅硯一面高麗青坐布一

具烏皮履一量墨二挺黃絲布被襜一領南榴枕一  
枚和香一盒鐵錫杖一柄象牙管一管麈尾一柄烏  
油鐵鉢一口并袋斑竹筆二管銅匕筯一具犀角如  
意一柄并匣白檀曲几一枚銅重盃三口石青鑪奩  
一具山水繩牀一張銅搔勞一口銅香火匕筯一具  
白檀支頰一枚銅澡罐一口南榴夾膝桃一枚竹蠅  
拂一柄鐵剪刀一口蒲移文木案一具并褥犀莊瓜  
刀一口鐵剃刀一口黃絲布隱囊一枚紫檀巾箱一  
具鐵鑷子一具白瓦唾壺一口并籠巾柿心筆格一  
枚銅燭擎一具鑰石莊柿心經格一具犀裝書刀一  
口白團扇一柄爪篆龍篆縣針垂露飛白倒薤魚篆

科斗小篆大篆字穀皮屏風一具淨人善心年十一  
右樸開皇十一年十一月二十三日又施物至玉泉  
寺五彩四十九尺幡二張五色斑羅經巾二枚絹五  
十疋錦香鑪檀十張熏陸香二筋剃刀十口鷄納袈  
裟一領油鐵鉢十口雄黃七筋須彌檀五領又施天  
台山納袈裟十領龍須席二領須彌檀二領猫牛酥  
三瓶熏陸香一盒及爲太子仁壽元年十二月十七  
日施天台山白石香鑪一具大銅鐘一口鷄納袈裟  
一領鷄納褊衫二領四十九尺幡七口黃綾裙一腰  
氈二百領絲布祇支二領幡一百口和香二盒胡桃  
一籠衣物三百段麥麩一盒石鹽一盒酥六瓶二年

又施天台山飛龍綾法衣一百六十領幡一百五十  
張光明鹽一石酥五瓶又別賜灌頂法師金縷成彌  
勒像并夾侍菩薩聖僧周匝五十三佛織成經檀七  
張織成經袋二口熏陸香一百筋酥合和香一筋陳  
隋二主皈依智者恣行五欲自斷善根所賜嚬施本  
無足紀策以其中名相多六朝方物方言文人攷据  
間有所遺因附載之爲淹通者資一二異聞奇字耳  
又智者答上晉王萬春樹皮袈裟一緣乃梁武帝時  
外國所獻者晉王謝啟云菩薩戒稱所著袈裟皆染  
使壞色況復自然嘉樹妙彩天成相應之言無勞外  
假萬春表長生之稱二翼合善譬之辭永服周旋恒

客屋齋言 卷三  
三  
充布薩常事半月豈惟六日著如來衣深荷慈獎謹  
和南衣名甚新奇啟文亦妙

金甲人

何工部遵正德中疏諫南巡廷杖死世廟初贈公尙寶  
卿官其子一人南畿志言公贈光祿少卿誤也公葬南  
郊且百年矣其孫諸生應鼎常夢一金甲人謂之曰亟  
改扞而祖吾爲而祖所壓且百年柰何形家亦言地非  
吉壤應鼎乃改葬旣開墳則棺木已腐而形故不壞面  
如生目開而睛甚黃衣紅袍色猶未變也掘其下果有  
磚甃爲古塚不知何人之墓且當何公葬時豈不知是  
前人塚而扞之皆異事也

先祖夢中三人

萬厯己卯秋先祖贈中憲公夢一人語之曰今科報中  
式者三一者之北門橋一者之翦子巷一者之上新河  
覺而臆其說是科無驗庚辰冬先祖謝賓客矣踰三年  
爲壬午應天中式者三人第六名沈天啟住翦子巷第  
十二名黃夢麒住上新河第十四名張文暉住北門橋  
夢之奇中如此且踰一科始驗夢之人已逝而兆始符  
造化之巧真不可測也

秦檜女墓

王君履泰言秣陵鎮人曾掘地得塚朱其棺以銅爲甃  
度之美中多金銀器報於巡檢司官勒誌石秦檜第三

女也官亟令人掩之金陵瑣事載嘉靖末江甯鎮人有掘得檜墓者所獲不貴官因惡檜而緩其獄案元金陵志檜墓在牛首山在江甯鎮南木牛亭者其祖瑩耳未知孰是

猿妖

張韞甫言嘉隆間一部郎之妻偶出南門梅廟燒香爲物所祟每至輒迷眩百計遣之不去後部中一辦事吏諳道錄符水郎命効治之吏設壇行法別以小鑿攝怪久之鑿內嘖嘖有聲吏復以法咒米每用一粒投鑿中其怪卽畏苦號叫似不可堪忍者問其何所來怪答曰本老猿也自湖廣將之江以北道過金陵偶憩於高座

寺樹杪而此夫人經行其下適有淫心遂憑而弄之耳吏以符封鑿口火焚之怪遂絕案宋高僧傳載會稽釋全清工密藏禁咒法効治鬼神所治市僧王家之婦草爲芻靈立壇咒之良久婦言乞命乃取一鍔驅芻靈入其中叻叻有聲緘器口以六乙泥朱書符印而瘞之卽此術也

翟氏

友人翟德孚名文炳以庠生援入監第四子聰敏能文而病瘵其家多妖祟日夜拋擲瓦礫不休德孚請劾鬼者治之設壇於所居樓之庭中而置鑿以俟久之婦人啼哭嗚咽自樓而下趨入壇上鑿中悲悽不可聞云

是德孚亡婦不忍舍吾子來相顧耳今何意煎迫至此  
亡已請勿葬我葬則永無生路矣德孚不聽竟於園地  
掘坎瘞之所擲瓦礫遂絕而子竟不起此上二事與瑣  
事所載方庵杏花村事正同

語怪錄

魯南陳先生著語怪錄中四則一日秦雲字士龍金陵  
人也號南堂居士有詩名爲定西侯記室不得志卒於  
彭城金元玉家嘗召箕書案上云吾南堂居士也請賦  
一章卽降箕云十年塵足走京華桃李春風幾度花地  
下尙懷天子殿世間依舊故人家鐵城野哭存青眼玉  
壘蠻戈蕩白沙怨恨征西元帥使不如江海泛仙槎一

日方伯吳公彥華爲參政時出按部宿公署中夜入廁  
自置燭地上見一人爲執燭起黃裳綠衣女子也公不  
敢仰視久之遣執燭前導過牖下門子皆熟睡撼之不  
醒遣入室取衣冠危坐日置燭案上揮之出乃去一日  
劉司空麟初爲刑部郎出理刑於澶淵夜方寐有物如  
木棉團壓於被遂不能醒強振起去若飄風少寐又復  
壓被上如是者三乃呼門役皆入室不能醒公自起逐  
之若烟從牖隙中去一日周公約菴巡撫延綬時榆林  
一婦方產渴思飲水飲輒至滿桶自是不食亦不復與  
人間事矣終日求掩埋其夫苦其亂從之穿穴使入上  
留一竅越數日啟視猶生城中人以爲神強出之將以

布裹其軀漆而爲供奉公聞而怪之鼻其衆召婦至臺訊之婦曰吾不粒食久矣非人間所宜存者但掩埋可何治爲竟遣之不知所終余又記王公少治官刑部差竣歸京未攜家往寓中臥室以蓆布地夜忽覺有物壓其胸而身遂如在磨盤上旋轉如風眩運甚然心了了強力簸頓之其物墮牀下走蓆上窅窅有聲急呼僮起逐之僮倉卒開門遂逸去此與劉公所遇正同皆狐妖也

陳公善謹錄

司馬王公做身短紗帽作高頂鞞著高底輿用高扛人呼爲三高先生

顧太僕居憂鬚髮盡白至服闋北上乃皆烏之人曰鬚髮亦起復矣

陳鐸爲指揮善詞曲又善謔常居京師戲作月令惟記其二月下云是月也壁蝨出溝中臭氣上騰妓鞞化爲鞋最善形容化爲鞋更可笑也

夏學正病有傳方焚漆頭巾作灰酒服之其子取服頃之煩燥而卒學正少與南太宰張公濂同舍因爲志其墓其銘曰少學於學宮旣官於學宮今也卒於學宮嗚呼夏公黃摛之畫事爲改數字少學於頭巾旣官於頭巾今也卒於頭巾嗚呼夏君太宰聞之歎曰眞油嘴也南部考察刑部黜一郎中時陳留劉公忠爲太宰人問

劉何以得其情而黜之擣之曰王願左右而言他時王  
考功韋顧驗封璘爲劉所信任故云

蔡承之見碑龜趺問周子庚曰此亦龍種有別名非龜  
也偶忘之周答曰名老蔡承之笑曰問誤也大龜曰蔡

### 怪石

東坡先生黃州江岸細石第有溫瑩如玉或深淺紅黃  
之色或細紋如人手指螺文又有一枚如虎豹者有口  
鼻眼處而已余鄉王藩幕家有 大石子中具兜塵觀  
音像面目跣趺儼然如生衣袂亦復分曉又程別駕家  
南門外有石子累數百有白質五彩文或黑質素文中  
或現北斗七星或具山水草木狀或具鸚鵡眼或如桃

絲竹根圓點數十斑駁如畫或赤如丹砂或碧如翡翠  
種種奇特不但如東坡志林所書矣石多出六合山中  
今盡爲人掘取如前所記一枚直可錢數千

### 目靜齒動



余向偶病齒痛有人教以常漱且叩曰目病宜靜齒病  
宜動因讀志林記張文潛語曰目有病當存之齒有病  
當勞之不可同也又記黃魯直語曰治目當如治民治  
齒當如治軍治目當如曹參之治齊治齒當如商鞅之  
治秦知此說其來久矣

### 評花

余嘗評牡丹花虞美人花菊花似紙花扶桑花似縐紗

花芍藥花似絹花玉蘭花梔子花秋海棠花百合花玉  
 簪花西番蓮花似通草花桂花蠟梅花似蠟花蘭花似  
 角花梅花似鱗魚鱗花而東坡先生志林與王文甫評  
 花言茶蘼花似通草花桃花似蠟花杏花似絹花罌粟  
 花似紙花則既已先之矣

客座贅語卷三終



70019188

